

րիմ է, իմաստուն առնէ պողպա: 52 Արդարութիւն Տեառն ուրախ առնէ պիրտս. պատուիրանք Տեառն լոյս են, եւ լոյս տան աչաց. երկիւղ Տեառն սուրբ է, եւ մնայ յաւիտեանս: 53 Դատաստանք Տեառն ճշմարիտ են, եւ արդար է ի նոյն. ցանկալի է նա քան զուսկի, եւ քան զականս պատուականս բազումս. եւ քաղցր է նա քան զմեղու խորիսիս^ա: 54 Իսկ որոց զանձինս իւրեանց յապականութիւն տուեալ, եւ նիւթ հորոյ պահէ զնոսա: 55 Ոչ են բանք եւ ոչ են խաւսք, որոց ոչ լսին ձայնք նոցա. այլ նոցա ընդ ամենայն երկրի ել բարբառն, եւ մինչեւ ի ծագս տիեզերաց են խաւսք նոցա^բ: 56 Իսկ որք ոչն լսեն¹՝ եւ որք լսեն, պահէ նոցա Տէր զհատուցումն նորա:

57 Չայս ամենայն բանս, եւ որ ինչ այսմ եւ սմին ինչ նման էին բանք, խաւսեցաւ սուրբն Ներսէս ընդ կայսերն, եւ զայն յաւել՝ եթէ յարէ յայսմանէ մինչ յաւուրս հնգետասան վասն ողորմածութեան բարերարութեանն վասն ներելոյն անսացեալ քեզ, կետ ժամանակաց այնչափ աւուրց անսացեալ քեզ, եթէ ոչ ուղիղ եկեսցես ի հաւատսն, նշան քեզ այս լիցի. որ մինչեւ յայն աւր ի հաւատսն ոչ հաստատեսցիս, յետ լիւրոյ եղեալ կիտին՝ մեռցի մանուկն. զի գիտասցես եթէ հաւատարիմ է այս ամենայն, զոր խաւսեցայ առաջի քո:

58 Եւ իբրեւ լուաւ թագաւորն զայս ամենայն, զի մինչ դեռ խաւսերն առաջի նորա՝ նա լուռ եւեթ կայր, ոտն զոտամբ արկեալ, արմունկն ի ծունգ եւ ձեռն ի ծնաւտի՝ նստաւ այնպէս, մինչեւ կատարեաց խաւսեցաւ զամենայն զբանս իւր: 59 Եւ զրէին զայս սեմիարք նոտարացի արքային, որք կայինն առաջի թագաւորին: 60 Ապա մեծապէս ի ցասումն բողբեալ լիներ թագաւորն, եւ տայր հրաման՝ երկարթի կապանաւք մեծապէս կապել զսուրբ եպիսկոպոսապետն Յայոց զՆերսէս, եւ արկանել ի փիւղակէ. զի մինչեւ տեսեալ ուշ ունիցի մանգանն, եթէ կեցցե՞ր եթէ ոչ. ապա յետ այնորիկ տեսցէ զինչ արժան իցէ առնել: 61 Ապա յետ լնուլ աւուրցն հնգետասանիցն անցելոցն, սատակեցաւ մանուկն որդի կայսերն, եւ ընդ ամենայն՝ այն ժառանգ գտաներ նորա: 62 Իբրեւ ելաց եւ կոծեցաւ որչափ կոծեալն էր, ապա ետ հրաման եւ ածին առաջի իւր զսուրբն Ներսէս: 63 Մաւտ առ ինքն կոչեալ հարցաներ, եթէ ի ձե՛նջ քրիստոնէից եղել մանկանն մեռանել: 64 Իսկ նա ետ պատասխանի եւ ասէ. Յնգետասան աւր յետ բանիցն եղելոյ երկարեաց Զրիստոս, թերեւս դարձջիք. իսկ իբրեւ ոչ դարձայք, սատակեցայք: 65 Իսկ դու այժմ եթէ հաւատասցես, կարող է Որդին Աստուծոյ Յիսուս Զրիստոս յարուցանել զնա, եւ հանդերձ որդուվն քո եւ ամենայն ընդանեալքն:

66 Ապա զայրացեալ ընդ բանսն թագաւորն, կամեցաւ զնա չարամահ առնել. ապա մատուցեալք առ թագաւորն աւագք իւրոյ դրանն եւ խորհրդա-

^ա Հմմտ. Սաղմ. ԺԸ(ԺԹ) 8-12:

^բ Հմմտ. Սաղմ. ԺԸ(ԺԹ) 5-6:

¹ Պակասի ընկալցին զպատիժս